


TEZĂUR LITURGIC

20 IANUARIE

ACATISTUL SF. MUCENICI IN, PIN ȘI RIM



MOSCOVA, 2000



Акафист

СВЯТЫМ МУЧЕНИКАМ

Инне, Пинне и Римме

Кондак 1

Избраннии угодницы Божии, святии страстотерпцы Христовы Инно, Риммо и Пинно, память вашу чтуще песньми похвальными, воспеваем вас, яко Царствия Божия благовестителей и похвальная восписуем вам, заступником нашим и в скорбех помощником: вы бо, яко сосуди благодати суще, исцеляете душевныя и телесныя наша язвы, от всяких бед и напастей, и скорбей свободждаете нас, с верою и любовью зовущих :

Радуйтесь, святые мученики Инно, Пинно и Риммо, теплии о нас пред Богом заступницы.

Икос 1

Ангелов и человеков Творец и всея Вселенныя Зиждитель, во святей Троице Единый, благодатию Свою озари и наполни вы, преславные мученицы Инно, Пинно и Риммо, вы

бо единомыслием просияли есте, во славу Господа усердно во благовестии потрудились и Христу последовавше во крестнем пути вашем. Ныне же во славе купно со апостолы и мученицы предстоите престолу Троицы Всесвятыя и молитесь о нас, взывающих вам сице:

Радуйтесь, первыя сынове народа славянского, во славу святых восшедшии;

Радуйтесь, пути к богоугождению единоплеменником вашим отверзшие;

Радуйтесь, паче благ преходящих любити Христа научающие;

Радуйтесь, заповеди Спасовы ревностно соблюдать наставляющие;

Радуйтесь, от прельщений и заблуждений духовных ны свободяющие;

Радуйтесь, всем чтущим вас преславно на помощь ускоряющие;

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 2

Видев вас, досточудные Инно, Пинно и Риммо, святой апостол Андрей, мужей добрых и душею чистых, благовести вама о Спасителе; вы же слова его богодухновенныя в сердце восприяша, и благима и усердными последователи Христа, являетесь, воспевая благодарственно Иисусу Сладчайшему, светом истины своея вас озарившему: Аллилуйя!

Икос 2

Разумныя очеса ваша вперивше в познание истинныя веры, вы, святии Инно, Пинно и Риммо, мужемудренно отвергостесь языческаго прельщения, и за исповедание единого истиннаго Бога радостно лютую смерть прияша. За таковое ваше, еже за Христа, святое дерзновение взываем к вам сице:

Радуйтесь, сердцем своим Единому Христу служить вожделевшие;

Радуйтесь, сего ради наставлениям святого Андрея внимавшие;

Радуйтесь, первозванного апостола с любовью почитавшие;

Радуйтесь, к Истинному Богу всею душею прилепистася;

Радуйтесь, дом Духу Святому себе
сотворившие;

Радуйтесь, Безначальному Отцу всем житием
преславно угодившие;

Радуйтесь, святые мученики Инно, Пинно и
Риммо, теплии о нас пред Богом заступницы.

Кондак 3

Силою Божественною подвигаеми, на
умоление соотчичей ваших явльшеся, им есте
покровители, защитницы и помощницы; страны
бо их от нападений вражиих избавляете,
страждущих от всяких недугов и болезней
исцеляете и во всяком благом преспеянии
помогаете всем вопиющим Богу: Аллилуиа.

Икос 3

Имуще воистинну воины Христовы, Инно,
Пинно и Риммо, пламенные и нехладныя сердца
ко благохвалению дивнаго в чудесех Бога,
молитесь непрестанно о спасении душ к вам
усердно прибегающих. Сего ради мы от глубины
сердец наших умиленно приносим к вам
таковая пения:

Радуйтесь, вышним Богом из тьмы
идолослужения изведенные;

Радуйтесь, в чудный свет истинного
богопознания приведенные;

Радуйтесь, истиннии Евангелия Христова
последователие;

Радуйтесь, Христовым Страстем
подражателие;

Радуйтесь, благоугодившии Богови словом и
житием;

Радуйтесь, всельшиися во обители Отца
небеснаго;

Радуйтесь, святые мученики Инно, Пинно и
Риммо, теплии о нас пред Богом заступницы.

Кондак 4

Бурю страстей внутрь имея, помышлениями
суетными обуреваемы, не возможем, величия
мученичества вашего, богоносные Инно, Пинно
и Риммо, проповедати, обаче вашима
молитвами ко Господу в правоверии и
благочестии укрепляемы, с радостию и
надеждою воспеваем Ему: Аллилуйя.

Икос 4

Слышавше грозное повеление владыки нечестиваго, да отвергнетесь Христа, жертвы принесете идолом. Вы же, мученики Христовы достославнии, помыслисте день второго пришествия на землю Владыки Христа и нестерпимый гнев суда Его, егда приидет во славе Своей с небес и вси святии Ангели с Ним; сего ради, воины Христовы, неодоленнии в терпении мнозе, прияли есте муки Царствия ради Небеснаго, примите убо от нас хвалебныя песни сия:

Радуйтесь, Божественных писаний добрии ученицы.

Радуйтесь, одежды крещения непорочнии хранителие.

Радуйтесь, Христа вседушно возлюбившии;

Радуйтесь, яко сокровища небесная вас прияша, яко пшеницу зрелу.

Радуйтесь, ихже Христос ублажи и наследники земли живых показа.

Радуйтесь, трисветлая свещы, невечерним Троическим светом сияющыя.

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 5

Боготечным воистинну путем шествовасте, ученицы Христовы, егда во узах суще, идолом не послужисте, Христови же единому поработасте, горькая испытанія прияли есте, святїи Инно, Пинно и Риммо; но вся претерпесте за возлюбльшаго вас Спасителя. Темже просим вы: научите ны великому терпению и крепцей любви вашей ко Господу, да возможем купно с вами во веки воспевати Ему: Аллилуиа.

Икос 5

Узреша Иисуса Распятаго взором духовным, прехвальныя страсотерпцы, егда ведены быша на место мучения вашего, души бо предаша в руце Божїи, телеса же предаша в руце мучителей. Таковую любовь ко Господу мы, благоговейно воспоминающе, похвалами ублажаем вас сими:

Радуйтесь, любовью ко Христу, аки многоценным бисером, душу ваши украсившие.

Радуйтесь, действенным проповеданием сия любви верный путь во святыя нам указавшие.

Радуйтесь, мужественным смирением врагов своих удивившие.

Радуйтесь, кротостию вашей мучителем
ослепленных враждою умное прозрение
даровавшие.

Радуйтесь, мужественно смерть
притерпевшие.

Радуйтесь, небесную Иисусову сладость
вкусившие.

Радуйтесь, святые мученики Инно, Пинно и
Риммо, теплии о нас пред Богом заступницы.

Кондак 6

Проповедником Богоносным апостолом
поревновали есте, пред мучителями
безбоязненно Христа Бога проповедали есте, не
убоястася прещений зловерного князя
словенскаго, ниже козней невидимаго князя
мира сего, но свидетельствовали о Христе
Иисусе, усты вашими исповедающе Того
истиннаго быти Бога, Емуже взываете:
Аллилуиа.

Икос 6

Возсияли есте, яко звезды на тверди Церкви Христовой, Инно, Пинно и Риммо богохвальные, яко в мучениех ваших исповедали есте себе быти верными учениками распятого Спасителя, Той бо даде вам уста и премудрость, имже не можаше что противу отвещати мучитель, но посрамляшесь, истиною побеждаемый, еще же и страданьми вашими свидетельствовали есте все ваше к Иисусу Сладчайшему желание, и ужасохуся людие, видяще ваше доблественное терпение, и познаваху на вас силу и помощь всесильного Бога. Темже верою и любовью память вашу святую почитающе, вопием сице:

Радуйтесь, в кротости и смирении Христу Богу подражавшие;

Радуйтесь, яко со Христом пострадасте, да с Ним и прославитесь.

Радуйтесь, присно за нас Творца молящих.

Радуйтесь, в Царствие Небесное нам вход отворяющих.

Радуйтесь, своим предстательством нас от бед защищающих.

Радуйтесь, души наша и тела безмездно врачующих.

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 7

Хотяще вечное спасение получить, всеблаженные первомученики славянские, Господу нашему во всем подражали есте, скорбным путем к Царствию Небесному шествуя: взявше иго Христово на себе и смирению и кротости научившиеся у Иисуса Сладчайшаго, обрели еси у Него наследие неистощаемое, воспевая Дивному во святых своих Господу: Аллилуйя!

Икос 7

Новую показа ярость безчеловечия злобный Вавадон, егда повеле вас, святые мученицы, ко столпу привязати и в студеные воды реки Дуная погрузити. Вы же горячею любовью ко Господу утешались и возгревались, ибо через муки сия востекли есте в чертози Отца Небеснаго. Мы же ныне кончину мученическую вашу воспоминающе, таковые величания приносим:

Радуйтесь, течение мученического пути добре скончавшие;

Радуйтесь, _____ житием _____ вашим
равноапостольстим Господу послужившие.

Радуйтесь, яко вы не посрамите нас от
чаяния нашего.

Радуйтесь, яко молитвами вашими мы
уповаем получить отпущение грехов и жизнь
вечную;

Радуйтесь, благословеннии Отца Небеснаго,
наследовавшии уготованное вам Царствие от
сложения мира.

Радуйтесь, яко и мы вашим заступлением
чаем избежать участи стоящих ошуюю Престола
Судии;

Радуйтесь, святые мученики Инно, Пинно и
Риммо, теплии о нас пред Богом заступницы.

Кондак 8

Странно бе неверным зрети, како вы святи
Инно, Пинно и Риммо, сквозе мразную воду
внидоша к небесному покою, идеже в теплоте
любве вашае со ангели и архангели купно
величаете Троиипостаснаго Господа, и Владыку
нашего, воспевая Ему: Аллилуйя!

Икос 8

Всем сердцем Иисуса Сладчайшаго возлюбили есте, святые Инно, Пинно и Риммо, ничтоже предпочитая паче любви Христовы. Сего ради молим вас: и нас в любви ко Господу и Его Святей Церкви утвердите, да вопием вам со благодарением таковая:

Радуйтесь, яко Предвечному Богу во славе вечной предстоите;

Радуйтесь, яко о всех чтущих память вашу, пред Ним ходатайствуете.

Радуйтесь, сугубую благодать от Него приявшие ищущим спасения помогати;

Радуйтесь, даром врачевания недуг душевных и телесных от Него прославленные.

Радуйтесь, сердца наши благодатью Божиею, вам данною, очищающие;

Радуйтесь, очи наши духовные к зрению Бога изошряющие;

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 9

Всякия скорби, болезни и прилоги наша вы утોяете, святїи мученицы, и темныя зраки лукавых бесов далече от нас отгоняете, да тако вашею помощію, благодатию же Божіею спасаеми, благодарным и радостным гласом воспеваем Богу: Аллилуиа.

Икос 9

Витїи многовещаннїи не возмогут достойно восхвалити ваши за Христа страдания и светлую кончину вашу, мученицы прехвальныя Інно, Пинно и Риммо. Ныне же Света Податель, Господь и Творец, в Царствїи Своем, яко други Своя, вас, мученицы славнїи, трапезою небесною питает. Молитесь за ны, да и мы сподобимся со Христом Иисусом вкушати от щедрот Его, вы же примите моления наша:

Радуйтеся, правду и истину безстрашно проповедавшие.

Радуйтеся, славнїи ученицы святаго апостола Андрея Первозваннаго

Радуйтеся, стольный град Киев в дали необозримой таинственно в славе Божіей предзревшіе.

Радуйтесь, проповеди Слова Божия славно и радостно послужившие.

Радуйтесь, яко предстаще Престолу Господню, сподобилися есте поклониться Ему и получитьи от Него вечную награду;

Радуйтесь, обитающие во светлостех святых, идеже несть болезнь, ни печаль, ни воздыхание.

Радуйтесь, утешители всех гонимых и терпящих за Христову веру

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 10

Спастися нам преискренне желая, молитесь за нас горе у престола Божия, верные Христовы последователие Инно, Пинно и Риммо, и вашима молитвы пособствуете нам в странствии многотрудном земнаго жития, еже в покаянии и благочестии скончати, да сподобимся с вами купно воспевати Христу и Богу нашему: Аллилуиа.

Икос 10

Царя Небеснаго умоляете присно за чтущих вас, мученики преславные и благопобедные, яко

много может моление ваше ко благосердию Христа и Спаса Нашего. Темже, припадающе, молимся: услышите ныне и нас, скорбьми, болезнями и многими печальми обдержимых, и потщитесь на помощь нам, умилоостивляющи благоутробнаго Господа о всех, к вам с надеждою и любовью вопиющим:

Радуйтесь, любовь нелицемерную в нас воспламеняющие;

Радуйтесь, кротость и смирение нам показующие;

Радуйтесь, терпением и мужеством души наши украшающие;

Радуйтесь, нас, алчущих и жаждущих правды, насыщающие;

Радуйтесь, неверныя ко Христу преславно обращающие;

Радуйтесь, светом истины нас озаряющими и теплотою веры согревающими.

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 11

Пение акафистное возносим вам, мученики святые Инно, Пинно и Риммо и молим вас: испросите благоприятными молитвами вашими вся благая душам и телесем нашим, паче же оставления согрешений наших, да со умилением сердца выну поем Господеви: Аллилуйя!

Икос 11

Светозарные светильницы, от Триипостаснаго Света озаряеми, сущим на земли являетесь, богоносные Инно, Пинно и Риммо, просвещаете бо сердца верных и к разуму Божественному вся наставляете, поучая и нас со умилением вам взывать сице:

Радуйтесь, от проказы греховныя нас избавляющие;

Радуйтесь, утешение благое в сердца ниспосылающие;

Радуйтесь, упование на милосердие Божие благодатно вселяющие;

Радуйтесь, духовно бодрствовать нам помогающие;

Радуйтесь, яко никто же прибегай к вам помощи ради отходит от вас тощ;

Радуйтесь, обрадованныи на небеси и нас на земли укрепляющие в радостной надежде вечного спасения;

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 12

Благодатное вспоможение выше зряще, святой Лука Крымский, настави чада духовные свои сугубо чтити вы, богоносные страстотерпцы Инно, Пинно и Риммо, и во всяческих обстояниях к заступничеству вашему пред Всемогушим Господем прибегати. Сие же убо воспоминающе, просим вас, купно со святителем Лукою и всеми новомученики и исповедники российстими сотворите моление за ны, вопиющая с надеждою Господеви: Аллилуйя!

Икос 12

Поюще преславное о вас смотрение Божие и чудеса ваши, преславные Инно, Пинно и Риммо, чтим святую память вашу, яко небесных предстателей и помощников; веруем, яко Господь молитвами вашими вся просимая нам

дарует, и молим всеусердно, не забудьте нас, но всегда пребывайте с нами, да вашим заступлением и помощью ограждаемии, спасаемии и избавляемии от всех зол видимых и невидимых, вопием вам сице:

Радуйтесь, святое Церкви утверждение.

Радуйтесь, бедным людям чудесное поможение.

Радуйтесь, память вашу чтити нас научающие.

Радуйтесь, подающие людям благочестивым благопотребное.

Радуйтесь, быстрое нищих слышание.

Радуйтесь, многия прошения предваряющие.

Радуйтесь, святые мученики Инно, Пинно и Риммо, теплии о нас пред Богом заступницы.

Кондак 13

О прехвальные страстотерпцы Христовы и возлюбленнии заступники и покровители наши, святые мученики Инно, Пинно и Риммо; примите сие малое моление наше и богоугодными вашими молитвами избавите ны от козней вражиих и всякаго зла, да в мире и

благочестии и покаянии прочее время живота нашего скончаем и достигнем блаженного упокоения в вечных обителях, идеже с вами купно Триединому и Всемилосердному Богу нашему воспоем: Аллилуйя!

Сей кондак глаголем трижды, затем 1-й икос и 1-й кондак.

Молитва

О Святии и добропобедные мученицы Инно Пинно и Риммо! Призрите с Небеснаго чертога на требующих вашея помощи и не отвергните прошений наших, но, яко приснии благодетели и ходатаи наши, молитесь Христа Бога, да, человеколюбив и многомилостив сый, сохранит нас от всякаго лютаго обстояния: от труса, потопа, огня, меча, нашествия иноплемени и междоусобных брани.

Да не осудит нас грешных по беззакониям нашим, и да не во зло обратим благая, даруемая нам от Всещедраго Бога, но во славу святаго имени Его и в прославление крепкаго вашего заступления. Да молитвами вашими даст нам Господь мир помыслов, от пагубных страстей воздержание и от всякия скверны удаление; и да укрепит во всем мире Свою Единую Святую

Соборную и Апостольскую Церковь, юже стяжал
есть честною Своею Кровию.

Молитесь прилежно, святии мученицы, да
благословит Христос Бог всю нашу державу, да
утвердит во Святей Своей Церкви живой дух
правыя веры и благочестия; да вся чада ея, от
суетумудрия и суеверия свободившися, духом и
истиною поклоняются Ему, и о соблюдении Его
заповедей усердно потщатся; да мы вси в мире
и благочестии поживем в настоящем веце, и
достигнем блаженныя вечныя жизни на небеси,
благодатию Господа нашего Иисуса Христа,
Емуже подобает всякая слава, честь и держава,
со Отцем и Святым Духом, ныне и присно и во
веки веков. Аминь.

